

四庫全書

集部

欽定四庫全書

集部

學餘堂文集卷

六至九

詳校官檢討

臣劉錫五

助教

臣

常循覆勘

總校官庶吉士

臣何思鈞

校對官編修

臣沈清藻

謄錄監生

臣陶鳴珂

欽定四庫全書

學餘堂文集卷六

翰林院侍讀施閏章撰

詩文序

綏庵詩稿序

虎臣先生別十餘載書數至論詩辭古文外無一語及  
他事以予所為稍類於古遲予定其詩予歸自山左渡  
淮聞虎臣在白門庶幾一相見比至則已返金沙予寓

書未達又先以詩來屬序何其用心之勤以篤且善下  
人也夫詩以自然為至以深造為功才智之士鏤心剡  
腎鑽竒鑿說矜詡高遠鏤削元氣其病在艱澀若藉口  
渾淪脫手成篇因陳襲故如官庖市販咄嗟輻輳不深  
入人肺腸寢就膚陋其病反出艱澀下虎臣天才爽敏  
刻意好古匠心獨造瓌瑰森拔不肯一語近人讀中祕  
書春秋方盛廣蒐博討日浸月漬漸進自然其視古人  
奚若且忘富貴重行誼往往與布衣歡尊禮如大賓生

產日落能傾索急人虎臣豈僅以詩傳哉嗟乎梅邨先生三書論其詩詳矣予故略叙其為人云

去幽詩序

張子為邠州期月有居幽詩自為序又逾年坐事免官於是有去邠詩遺書示余且寄詩一章凡四百字其言真朴頗似杜少陵予發函嗟嘆近世縉紳視奪其官若裂肢體或不幸斥非其罪則俛首喪志捨地呼天氣鬱而不能抒心煩而不能理求其自放于文辭者鮮矣況

邠不可為土瘠賦逋歲數易其官且皆繁事不得去此  
其地誠不可終日居復何三致意於去幽乎哉君子之  
居位也不欣欣以喜其去位也不悻悻以怒張子性耽  
咏歌雅不習吏事其抑而為吏蓋以親老食貧冀得升  
斗祿養為二人驪而卒與世齟齬天殆將挫其盛滿之  
氣試之艱苦之塗以助其咏歌乎夫邠不可為歲數易  
其官而張子拮据補苴且將及報政之期紀績者數矣  
而終不免以失職去悲夫

李杞瞻詩序

立言之可傳者本之有物出之有章而其擬議變化要眇而不可測故簫韶之樂非一器之音易牙之庖非一俎之味詩書六藝之文非一言之美其所積者深以廣則其所發者大而該也文者道之餘也詩者文之一體也而風氣高下嘗因乎其地視乎其人昔遊京師稱詩諸公間大梁趙錦帆謂余吳人能不操吳音余笑曰吳音非不佳患不善吳音耳豈必規規焉步趨中原哉然

而東南之音多失之靡西北之音多失之厲殆由性成  
求其無長而寡病君子以為難此瞻秦人也余見之孫  
豹人坐上其雄爽之氣勃勃眉宇自秦之晉南遊江淮  
所遇山川風物寄此屬懷情隨境移蔚焉蒸變觀其羈  
旅無聊不平之作益秦風而無乎吳楚者邪此瞻富春  
秋擬議變化其進未有已嘗為余言母夫人見背時生  
甫十許日失恃之痛銜恨終天徃徃見之於詩使人不  
可讀余三歲喪母與此瞻稍異而抱痛則同每語及此



相對泫然不忍言詩吾又嘉此瞻之不僅以詩自詡也  
為序而識之

李朗仙江淮草序

天下山川形勢之險蜀為最自漢以來工文辭如司馬  
相如王褒揚雄李白蘇軾諸人尤最多予北抵燕齊南  
游荆楚閩粵獨蜀為未至嘗裹糧具舟思一泝三峽攀  
劍門徧觀杜拾遺所為詩處度所得必有異而卒不果  
往以是翹首西南常怏怏今營山李子朗仙將歸蜀矣

以其客遊江淮者發為詩壯采颺舉未免有懷鄉感物  
之悲蓋李子之先人嘗仕淮會明末蜀亂道阻李子生  
遂家淮之鍾離今年且壯矣其甥張公菊水以左官叅  
佐宛陵李子於是有敬亭之游又善吾友梅子耦長詩  
日益富間過余談讌以永日其舅氏陳公嘗守吾郡遺  
文散落又同張公收輯用永其傳余以是敬之不敢僅  
目為文士夫古今人非不相及也所以不及者少壯時  
馳逐利欲狗馬聲色以汨其心以銷亡其神智故逡巡

中廢及其老大而思奮強弩之末矣李子壯年客處蓄其果銳不即人之所圖而與古為稽其鋒不可嚮邇夫司馬相如王褒揚雄諸人皆生於蜀者也杜甫詩最夔州以後蓋久客于蜀者也說者皆謂得山川之助李子蜀人而非生于蜀其歸亦客也以蜀人而為蜀客蜀又當兵革存更之後井邑成墟親舊凋隕其胸中轆軻全涌之氣視杜甫作客時當更有難言者李子其必衮衮有作也以視江淮之詩又當一變請得嗣觀而極論焉

朱山暉循寄堂集序

文辭之與利祿若相避然終身禁近足不踰國門得載筆為蘭臺石閣之文其言不必工出叅藩牧觀察郡國歷乎關塞嶺海放為羈愁憔悴之言其官不必達起家著作之林馳聲於山徼海隅無人之地廣採遐觀鬱為詩歌才大以兼豈不誠難矣哉同年朱山暉先生舉進士用文章發聞讀書史館出入執一卷自隨居則坐擁木榻不微逐貴遊是時于官比部數與之論詩馬首未

幾改水部歷銓曹落落如故乃有備兵口北之役已又  
遷副使防海登萊余亦出為山左學使者登州東極滄  
溟丹崖絕島雲物百變故子瞻歌海市處予駐節較士  
時聞山暉且至躍然以喜思得共故人把酒捫子瞻之  
舊刻觀海市之靈竒相與流連極唱詠為歡而山暉後  
期不及待遂去既抵濟南得其東年寄和諸詩未嘗不  
追以為恨庸詎知後此二十年不復一再見哉詩文小  
道昔人比之輦輓山暉在官廉謹深沈有大略每出視

事吏抱牘堆案不移時剖決退食陶然不廢嘯歌其初蒞登萊也軍餉不繼脫巾洶洶顧區辦立定召諸弁庭數之無敢譁時海艘闌入京口直犯江寧偵騎日數至山東震驚而坐鎮無動容六七年間轉徙河北崎嶇嶺表處軍興民病之時所至皆有聲跡先是富平故多名公卿然無起自庶常者有之自山暉始其迎養太夫人於官也具翰林儀仗邑人榮之左右奉侍歡甚尤篤意故舊嘗與李給諫天中善天中被譴出關追送不及每

言之泣然曰吾負此人其行誼若此詩有循寄堂集文  
有函始集共若干卷自言寄跡一官有滄洲之興下筆  
超然獨異其子樹滋厲志學行見推於吾友顧寧人今  
輯其遺編以傳可謂能世其家也已

綠曉堂詩序

始余客南州有示以鄒君流綺名家集者濫采余詩余  
未獲見其人蓋余同年子度之從父也又數年命其子  
芳挺犯風雪挈小舟來徵詩古文辭索其所刻十餘編

凡朝野紀載名臣烈士之蹟幽人淑媛之詞罕不甄錄  
會歲暮未得卒覽而芳蕤又屬序其詩坐待于客舍夫  
文章之蕪落久矣鄒君之父子汲汲奚為者自古能言  
之家累車不能載其書連牘不能數其姓氏昭明創為  
文選聚千古文人於尺籍中世目為選體後人廣之至  
再卷帙滋繁見者滋少寇亂以來故家藏書多見剽為  
鎧甲付之煙燼僅有存者易米而炊曾升斗之不給以  
視詩書牆壁又一時也當是時紈絝之子以簡籍為贅



疣有人於此網羅捃拾考獻徵文至割膏腴以資剗剗  
可謂博覽好事獨為所不為者矣中壘父子經術徐陵  
家世詞名鴻筆之彥類有相承芳蕤少年警敏日侍其  
尊甫左書右詩朝吟而夕誦求不蹇其芳澤不可得也  
今錄曉堂詩數卷備古今體睥睨作者南州李宗伯序  
之詳矣余故椎魯近又以病懶自廢嘗以謂詩之工者  
非學所得強而非學之篤且深則其所為工者卒不可  
倖而致羿射秋弈專一藝之能未有不畢終身之力者

也鄒子生毘陵文學之鄉家有賜書沃其本以昌其華  
吾殆將伏膺而俯焉昔人不云乎風水相遭而文生焉  
夫無意為文而文生所謂天下之至文也

吳非熊詩序

山人詩與縉紳自異蓋其地使然處巖穴而務為富貴  
之言謂之不衷若翦削太甚氣寒力薄視一言一字之  
近於高華若將浼焉此特田夫村老之言目為山人人  
之稱山人者豈徒然哉摩詰富貴人下筆輒蕭然物外

浩然以布衣齊名觀其詩豈嘗有岑寂寒儉之態哉故  
夫山人之詩未易言也吳非熊山人之能詩者也好苦  
吟若峽猿哀嘯而清健鬱蒼非一目所能盡其稍近樸  
拙彷彿少陵之遺意焉此其所以獨勝也伯璣拔其尤  
秀者若干首而屬余論之夫山人鬪草篇非其至者而  
平生獨以此得名於乎詩可易與人言哉

許侍御詩序

侍御許青嶼先生偶刻其出都之詩曰放船州其既出

而復入者曰遵渚州二帙不足盡其詩什一然悱惻忠厚國門流傳以為有風人之旨夫觀人於進退得失之間本末立見矣青嶼為侍御號稱敢言按秦有聲績以細故奪官論者或為嘆息而先生鼓柁南歸無顧顧失志之態既閒居徜徉咏歌承中丞之世澤諸子弟又相繼顯名田園雖薄度當有以自老其卧而復出也以聖天子寬仁御下往時坐文法註誤謫斥者多見前渚次第皆柄用賢士吐氣故復昂首自奮顧瞻宮闕感戀

裴回殆有一飯不忘君者會事格不果請日與其友吳  
漁山用文酒相娛放浪公卿者舊間樓遲浹歲先生亦  
倦而將歸矣適予需次京邸逾月先返又以予為知言  
贈答數四且相約冬春待予於蘭陵之別墅嗟乎今世  
多才賢人浮於位新舊仕進之人例當得官者雲集輦  
下率數歲不得除亦暇問東吳菰蘆中尚有人哉

李叔則集序

古之立言者先養氣氣充於中淵淵渾渾莫知其端有

觸而動如蹈伏弩決河隄一發而不可禦日月星辰天之文也山川草木地之文也其間雲霞風雨雷霆霜雪鳥獸蟲魚人物之類鉅細萬變彫繪無所施其工陶冶無所用其力厯算無所窮其數燦然而在上者垂殺然而在下者列不知其誰尸者氣為之也推而至於一人一枝皆類是也善乎蘇子之言畫竹也竹之始生徑寸而節葉具焉非節節而纍之葉葉而綴之也畫竹者必先得成竹於胸中振筆直追其所見如兔起鶻落稍縱

則逝矣蘇子之言如此其為文也亦然古今雄辨若河漢行所無事者前有莊周後有蘇軾而已吾行天下見著作家頗衆勤敏便給罕有如河濱李先生者其為人博雅善記誦喜賓客與人坦然直遂詩文不起草有求者即席伸紙直書之或作飛白各題識持去其不屑斧鑿有嚶嚶道古之意見者皆嘆息縮手以為其文似子瞻詩似太白非近人所易及也先生與李太虛宗伯同姓交甚歡宗伯老於著作余從西湖獲見之盛相推引

獨未得見先生而貽書往來贈答不絕其贈我官齊魯也序數千言拳拳勉旃以孔孟之道甚矣先生之不以今人待我也予故樂序其集時取而觀之以發我胸中磅礴之氣焉

毛大可詩序

夏六月客居山陰蕭山毛子大可及何伯興書至亟相推許以所定越州詩選文園倡和詩見寄余發而觀之皆可誦者會以旱水渴舟楫皆阻余遙次其文園詩大



可與伯興諸子虛佇者久之不得見爰作長歌以寫懷  
思其詩曰越人擁楫久蒙好慷慨悅君知不知誦之淒  
惻婉孌一唱三嘆何其情深旨永纏綿而不可解也余  
將歸艤舟造訪則大可至自山中握手語疊疊將達旦  
出其全詩相質余乃知大可之甄選越詩振興風雅者  
蓋有本也近體詩多新語不作淹熟樂府五言古哀情  
促響俳側無端其騷之苗裔乎七言古似謠似讖率多  
古音其長吉王建之間乎今四海干戈未寧獨風詩為

盛貧士失職之賦騷人怨憤之章宜其霞蔚雲屬也蕭  
故吳越要津舳艫絡繹四遠之至止者無不顧見大可  
而大可同里同郡復有諸君子晨夕相切磨詩有之曰  
倡予和女是其多所取也夫

徐伯調五言律序

山陰徐伯調書至曰曩與君論詩甚善君輒為我序近  
者放廢無事取古今詩分體各治之今五言律先成帙  
君為我定之予省覽數四刪其十之二三序曰夫近體

莫難於七言固已然五言長城昔人蓋重言之唐之初  
盛稱沈宋高岑王孟諸家大約溫柔淹雅典麗冲和如  
靜女穠花鏤金錯彩要歸於自然使人讀之心恬意愜  
一唱三嘆斯為極致獨子美沈鬱怪幻雄視百代如風  
雨雷霆猛獸奇鬼驚魂動魄咄咄不敢逼視杜律在唐  
實為變調而所為五言長城亦拓地萬里矣伯調之律  
以杜為宗以創獲為奇其于軟美輕俊手滑調浮及寒  
儉平易之作視之如糠粃雖貌似乎唐不取也故其為

詩熊熊渾渾磅礴光怪可喜可怖雖或鑱刻險仄不合時宜亦杜之苗裔矣即此一體足留伯調天地間況其詩不盡此乎予曩與伯調論詩薄視文長若附庸國惟我兩人所見略同今復論其樂如此吳越間多詩人丁飛濤毛大可諸子皆與伯調往復議論試以此質之當不河漢余言也

陳伯璣詩序

論詩於今海內其類有四就近望遠土苴古體一也遺

實采華矜氣悅目二也歷下竟陵互相齟齬三也諛辭  
駢巧干澤取憐四也屏茲四類而其詩或庶幾矣薦紳  
先生既嬰機務神慮耗廢又牽於文墨多所忌諱其屏  
此也恒難而貧士失職羈旅自放於江臯澤畔討風騷  
之極變覽山川雲物之參錯重以窮愁拂鬱思慕之無  
聊歡觸而歌哀至而哭有鬱必宣一往而深故其音頓  
挫每極於古吾友陳伯璣豫章閔之冑也避亂移家  
與劉遠公俱流寓蕪江杜門窮巷以詩歌自娛其言清

深冲淡秀而不纖肆而不莽家貧故倦遊雅志坐嘯不輕以言干人有詩之瑜而去其顙其在是與其鄉之先達負天下之望若熊公雪堂黎公左嚴極口推轂其在江南一時名公卿詞人皆樂與之游而吾友邢孟貞顧與治尤稱善信乎其學成於已而道孚於友也孟貞逝矣與治亦且老病余旦暮北征伯璣貧無以將母暫還南州視其既蕪之田園將有所經紀其尚母愛匡廬之秀香爐瀑布之奇築室五老峰下高卧而不出乎於其

別序以要之

李渭清燕臺詩序

詩得之山林易得之都市難非都市之能為詩累也心  
乎都市者之為累也韓氏稱富貴之人意得志滿常不  
暇以為而窮賤布衣屈首跼步東西走謁為之又不得  
吐氣二者交病古有據地狂歌避世金馬門者雖在京  
輦其視青山白雲殆為不遠矣李子渭清其有近乎古  
者邪渭清以諸生被徵擁書卧僧舍不肯干恩達官近

詩多豪逸清遠有類乎閒居之所為吾以謂有詩人之  
風而其家在東武枕藉瑯琊極乎滄海品林洞壑皆官  
然以深吾官二束欲往遊而不可得也渭清曠懷耆舊  
搔首故山徃徃形之篇什昔周司農櫟園觀察青州延  
賞為上客吾友王山長不輕推可獨序其詩無靳詞嗟  
乎士貴自立眼前富貴俄頃耳山左舊遊舉進士能詩  
者既有田子綸曹升六王仲威諸子李子與即墨楊子  
六謙又同召至都下不為不過吾嘗按其文拔最多士



今數來論詩詩日有聞蘇子瞻之告李方叔謂落其華而成其實毋少得於中而務張其外間舉以語二子忻然識之不忘吾喜諸子之足張吾軍也夫吾黨豈徒以詩雄邪

書帶園集序

書帶園集十有六卷梅氏朗三之書也朗三歿數年友人蔡大美沈治先泣告諸舊游請為刻行又數年其孤庚挾父書來臨江屬予序予嘆曰固予所欲言也夫物

貴孤生亦以類聚而生之甚難摧折之甚易此天之所為不可解也吾宣城于江上稱巖邑其山巉以秀水甘以清草木扶疎而沃若其清淑之氣所鬱積必有異能之士道德文章之美卓然見於天下而所謂道德者多隱君子其以文章見者至宋始有梅昌言聖俞元有貢仲章泰甫父子十數輩最著者聖俞以詩名去聖俞五百餘年喬孫為禹金先生文詞贍給雅善博綜其羣從李豹子馬勉叔諸人為王元美所並稱後禹金聞孫復

有朗三益庶幾與禹金相望者然梅氏自昌言學士外  
聖俞仕不過都官歐陽公傷其以窮死禹金以明經對  
策不第季豹子馬勉叔朗三皆困諸生中而朗三年不  
得四十以宛陵山水清淑之氣若私於梅氏之數人生  
之甚難聚之不易而皆摧折之若不甚愛惜其故何與  
豈人之所喜天之所憎與抑天實靳才而故嗇其年所  
以予之者不肯盡與才固難也居才尤難士之挾一長  
而掉頭瞋目侈然謂莫已若者限於器也朗三才既特

雋陳卧子曾手錄其作四遠咸推異之而其意嘗自下  
往三十年前獲予一詩輒榜之壁示客曰此必後來之  
秀時余甫學詩而見稱若此夫朗三善詩古文詞兼及  
書畫喜議論與人游溫柔克讓又好獎才彥無遺力余  
何斂衆美以萃其身而速天之摧折也悲夫悲夫

來諗居詩選序

於乎士之才而窮殆未有甚大美者也既困其身又靳  
其子其萬一永存者惟文辭耳所著來諗居集勝國陳

卧子諸公序之詳矣晚歲益自省括間示予相可否  
若憂其將老者今奄忽十餘年始得以其詩行將亟取  
一冊焚之以告墓蓋許佐剗厠故余疇昔執手之言而  
是編則余與梅耦長高阮懷後先所讐定也方其疾革  
時余適在秣陵乃手舉以屬耦長徵舊諾余歸聞其語  
輒嗚咽泣下大美平生快直與人交不庇其過又跌蕩  
文酒目眇視粹相遇閭巷間非即而諦觀之嘗不揖遜  
去以是得簡亢聲時被口語然故非亢也性好客喜遊

嘉客至必質衣具酒盡歡在郡為名諸生客亦多集其  
廬顧獨喜詩歌古文故其業不售以布衣終伯仲三人  
相友愛少弟李薦溺江死大美與仲氏玉立客姑孰徒  
跣江許日夜哭解裝募漁舟不給至齧指書要約重購  
之又灑血呼籲江神明日乃得屍歸葬鬻屋以償負時  
李薦子尚在母腹中贍嫠婦以鞠遺孤皆大美力也人  
有急不能周必告所親有力者共拯之聞人詩有警句  
手錄口吟若已出邑令余公颺好獎名士相睚就並舉

其所知而無所干請大美歿數年余公言之出涕且曰  
吾得盡交宛賢士大美教我也其為人如此而卒以無  
嗣妾吳氏最少用治命不嫁余見其窮餓零丁未嘗不  
心惻也於乎大美與余比閭懽晏其詩必先成屬和酬  
唱遂多自其歿而老成零謝比閭之酬唱亦已寡矣往  
在臨江見夢索酒哭以二詩遣力齋酒漬墓上同人見  
者皆嗟悼有作疊見於篇故併刻之以見其誼信於朋  
友且序其略使後有徵焉大美諱秦春別號芹溪萬厯

丁酉年某月某日生順治辛丑年七月初三日卒年六十五

高阮懷洪州艸序

湖西地故荒瘠民不喜事分守使者可卧治官舍枕山而憑江清流碧嶂爛然在目若寢處與俱者故於詩獨宜比歲徵斂旁午使者以吏事奔走不得息藏書數千卷不及開帙而故人賓客來者無簿書之困無交遊人事之擾陳冊發籍閒倚山樓歌嘯其中往往發興於詩



於是江山之勝日在使者目前而逡巡不得收者客皆  
得而專有之故其詩獨多吾友高阮懷治詩有年里中  
罕有先者往遊山左有詩一卷頃來湖西數月又勝山  
左時夫事非癖不傳力非專不精阮懷既癖於詩處登  
臨山水之地久客清暇其用力也專以精其修辭也鬱  
以秀其感興也愴以深余嘗謂詩以言志以被管絃四  
始六義不獨愁苦為工而余性不習吏事以未得釋負  
荷其言多憂危阮懷壯齒負才鬱鬱不得志其言多悲

憤母乃皆有所蔽而未聞道乎二樵者入山一坐山之麓弛檐息肩一攀巖而上徑滑磴險纍趺側足虎豹嘯舉雲霧晦冥目眩肢栗惴惴隕墜不如退而歸休息於山下今人出處貴賤亦如此矣況以高子之才其不久處窮約也余近知語言文字不足恃寢薄言詩阮懷別去留詩索序且有奉倩之戚乃序而復之以釋其意焉

儷蘅集序

昔人撰著詩書多藏之深巖大穴扁鑰遺子孫俟之身

後必有出而傳之者五代和凝自鏤其集百餘卷宋王  
雱版其文鬻於市並貽譏識者近世詞人髮未燥哀然  
成集而布衣野老韜光埋照俳側佗傚生不求合於人  
吞志以歿其遺書剝稿委弃羸篋子孫不以易衣食飽  
鼠蠹者鮮矣故得其人則書存不得其人則書亡惟古  
之有道者能不介介於文詞若夫修詞之士生死以之  
生既力竭死亦魂繫觀古今鬼詩有題石壁畫江沙馮  
于此嘯于戶牖或酸風苦雨之夜幽篁皎月之間躑躅

悲鳴咿嚶淒斷至聲形俱見與人倡酬累夕不絕此人  
皆意有鬱結不得見其才故雖死而齎恨懷愁鳴咽而  
難平也予嘗於亡友遺文收纂剝剝困不自卹蓋竊有  
感而然吾宗偉長復以儷衡集見屬一為其從叔求公  
一為宗人河采詩賦共若干篇二子生不同地而侘傺  
畧同又皆喀血死殆負才鬱結不平於心者嘗竊壯其  
志而獨悲其數奇善乎偉長之序其集也謂二子既窮  
死無可慰泉壤得一發其書聞其姓氏咨嗟怵愴使一

生血淚噴薄激昂不至與螻蟻烏鳶同盡者厚幸二子  
有知聞偉長之言必泣且笑於地下矣此作者之所為  
可愍也予未及見二子不能徵其行事然讀其詞則其  
人可槩見殿撰劉孝則先生嘗為求公作傳語具劉集  
中而吾邑距河采為近聞其篤學強記遇事輒書偉長  
旅食於燕樂與之遊且分粟相餉蓋其行誼均足述云

金右辰詩序

余既選季房詩又得金右辰橐蓋季房之亞也或曰季

房逸秀右辰雄邁亦各其長也觀其所自序以為詩尚風神矜興象睥睨王李且不肯優孟李杜卓然有得於風人之遺矣反覆其詩則在乎唐宋之間時有豪氣殆亦嘐嘐道古不飾其美不掩其疵者也然記問該博侃侃喜辯論臨川湯義仍嘗並推之謂其於星厯氣候兵筴河渠方技百家之言抵掌奮舌沛若懸河蓋不徒以詩見也而卒以不過終其身惜哉予拔其稍馴者若干首合之季房之集目為吉州兩處士詩蕭子孟昉聞其

風而慕焉遂並取刻之士固有不朽者不在乎文詞之  
未然垂空文以自表見不得志者之所為作也廬陵羅  
長源泌沒身閭巷所著路史卒行於世今二子齋志長  
逝久矣士大夫稱其詩不廢然則士之有挾以鳴而憂  
其湮沒無傳者聞數子之風其亦可以蹶然而興矣

劉仲修山陰集序

予讀練中丞金川集見有仲修遺墨跋因攷臨江府志  
知仲修者劉徵君永之字也所著有山陰集楊文貞公

嘗為之跋而歲久版廢其裔孫長壽將重刻之屬鄧孝  
廉來請曰是集也梁石門教子發兩先生論之矣願更  
假公一言余藏之既久一日舟中盡讀之然後知先生  
殆古之逸民也詩諸體楚楚五言古恬澹冲厚出入唐  
人其文氣雄暢取裁歐曾非苟作者攷其時當有明開  
國之初搜羅耆舊徵辟四方學行異等之士先生徵赴  
闕下宋學士潛溪盛相推服固宜出其所學乘時見用  
乃以重聽辭歸其果老病邪觀其平生詠歌大抵幽居



自適至答宋學士詩有預結茆屋待公跨鹿之語殆將  
招潛溪歸隱其肯自出邪先生故世家子貲產稍給知  
富貴之不可保而跼伏自全然卒以其子奉獲罪縣官  
沒其家且被徙客死何天報之酷邪是果其子扞文網  
邪或其避世嫉俗之意隱然見于眉間而為人所齟齬  
邪抑有司之媒孽眈眈其所有邪班固陳子昂並以文  
章名當世失勢家居不免為縣令所瘐死吾又以知文  
人高士之難為也然而名公鉅卿先後推重詩古文辭

獲見於世可以傳矣嗟乎仲修節行至高練中丞楊文貞嘗慨慕之其門人章詰何光輩能於患難磨滅之餘收刻其遺稿而不為先生立傳詳其生平僅僅於梁氏序中一想見之於乎惜哉

學餘文集卷六

欽定四庫全書

學餘堂文集卷七

翰林院侍讀施閏章撰

詩文序

顏修來詩序

歲之辛亥顏子修來相值於金陵是時修來以儀部郎  
權關龍江偕從父季玉刻有雜詠絕句及五言近體數  
十首堅光壯采著語能自起立度其意非得上駟則寧

廢州不肯出余蓋已心憚之既八年來京師輦下盛傳  
十子詩修來其一也觀集中山左詩人如曹子升六田  
子子綸皆蔚然深秀日進於古而修來東歸讀禮索其  
集不可得今年己未春修來錄寄古體詩來屬論叙時  
微雪灑庭讀之終帙知其詩之不肯輕出益可畏也士  
魁壘喜自負常掉頭不可一世及摧折發憤則瞠乎惟  
恐後人其志强者心彌下也志弱則無高軌器溢則無  
無蓄修來深思遠望有慨于中五言如太華燕子磯七

言如麥雨地震諸篇皆蒼鬱雄高出入於工部昌黎之間怪偉百態新城王阮亭侍讀嘗謂余曰吾鄉後來英絕當讓此人夫向之所為近體者余既見之金陵矣由今觀之其有稱於後無疑也語山莫如岱語水莫如海從其大者為言也必謂海岱而外無山水則是太華哉嶠之險華頂鴈宕之奇黃河之怒流三江五湖之澎湃飛泉駭瀑變幻無可端倪者皆不足與於山水之殊觀也然使有人於此自守其一邱一壑而以為泰山不必

登滄海不足臨也有不為山林海若所匿笑者哉詩之  
為道實有類於是故曰先河後海言有本也百川學海  
言有宗也修來蓄其雄銳積學而出上窺騷雅下仿杜  
韓其亦嶽觀而海遊者乎吾嘗病實學彫散詞場蔓草  
間過闕里觀禮器輒沈吟永日修來生於其鄉為復聖  
之喆裔將必有喟然歎興者嗟乎古能言不朽之士蓋  
未有無志乎道而能卓然垂後者也

王豸巖遺集序

無所挾而言者其氣不充有所挾而無怫鬱難言者其  
言不能悲以放今使閭巷之士推舉成進士受官執法  
所部數百里不為不得志卒之憂戚困踣旋仕旋已無  
歲月之獲淹其位即布衣窶士之憔悴亦奚加於是哉  
睢州王君豸巖為余同年友不見三十年頃過其鄉湯  
大叅荆峴詢及之則悼歎曰豸巖以窮死矣平生交最  
善篤志好學人也有詩詞各一卷子盍序之豸巖為文  
奇崛有稱於時嘗再仕建昌建寧兩郡推官並以憂去

欽定四庫全書

思齋詩集  
卷七

輒仰而喟曰天不欲我仕乎吾既祿不逮二親又不能  
與人俯仰出將奚為由是除服遂不赴選人日與二三  
耆舊觴咏狎游退則掩扉執一卷或歌以泣慨然有撥  
棄形骸翱翔海嶽之意識者皆悲其蓄奇氣不得一騁  
也昔毛子親在捧檄而喜及親歿不復仕豈嚴其以是  
飲痛也荆峴從事理學世所稱有道君子也豈嚴比閭  
相友善則其人之於官於鄉概可知矣千鈞之弩一發  
而息機掣電之馬不百里而稅駕豈非命哉詩詞不屑



屑步趨古人顏唐豪逸李太白蘇子瞻之遺乃叙以遺  
其二子於乎士之魁壘振奇沒齒不得一第其數奇尤  
甚於舅巖者又豈少哉

姜定庵兩水亭餘稿序

士君子家居則修其道為諫臣則盡其言有官守則勤  
其職所謂天下文章莫大乎是矣其溢而為詩歌賦頌  
之屬皆其餘也矜其餘以自異謂世莫我若也此斥鷃  
之決起於槍榆井鼃之見姍乎海若者也會稽姜定庵

先生治詩數十年近始出一編屬其鄉張荀仲先生命為序論吳越以詩名者衆矣定庵起家為令則以治行稱既徵入諫垣則忼慷奮舌數言天下大事論者謂其原本經術似劉向數奏詳剴似陸贄

天子褒然嘉異拔諸卿貳之選拜為京兆豈復以詞翰為勛業與聳肩苦吟之士爭工拙行墨間哉然其詩在朝廟則有肅雍之風在山川則極登望之美其見諸交遊贈答者皆誦之泠然以是知定庵非徒今世之能言

者也觀其自序以為鹿鹿無奇行而勤一世以盡心於文章者終歸泯盡為歐陽氏所悲悼益若懼此餘技之無足恃也其所見為近道矣販夫賈豎得尺寸之珍輒攘臂而炫諸市而猗頓之家衛霍之室百物委積狼藉漫不省記充乎其贏者泊若無有也吾故曰定庵非徒今世之能言者也定庵讀書喜賓客其平昔所與論詩張秦亭毛西河兩君子朝夕相上下蓋皆余所不逮也兩君子之論既定矣其又庸予言邪吾聞定庵將入佐

天子以母太夫人老日依子舍不能已又將繼南陔之詩矣

周伯衡南州草序

君子之與人也先其道而後其言其人有合於道不問可知其言之有異而世所謂工拙不與焉蘇子瞻稱山谷文章超然獨出乎萬物之表予不甚喜山谷詩竊疑其言太過今而知凡古人之可傳者皆超然有出於物表不以其詞之工也吾年友伯衡周先生久官南州日

在公私劇應中歌詠灑然嘗好讀左國晉魏之書唐以  
來文詞獨愛柳子厚於詩酷愛杜子美其所作多尚自  
然恥事雕飾不必盡工而要有所會於古人之道予嘗論  
其詩樸而秀直而雅顏唐而蘊藉而其清真一氣則得  
之子美為多初官翰林諫垣為清秩嘗手一卷既出在  
江湖之上無纖毫愠色數於舟車尊酒間得詩遇可與  
語則劇談飲過量客以詩來者苟有一言之合即布衣  
羈旅憔悴之士不深計其人何如輒與之往返游好與

予相磨切酬倡尤多予歲嘗一再至南州以得相就為  
樂伯衡每執手笑曰比久不作詩子來又使我多言矣  
夫伯衡之見取亦豈徒以詩哉徃予官比部君為給諫  
暇則相過即清談必夜分乃罷既而各就外補不見七  
八年辛丑秋余叅藩豫章伯衡為副臬王言遠為藩伯  
宋其武少叅繼至陳徵君士業遽喜詞人之聚也欲合  
序近詩而刻之為四君子豫章集予二人瞿然謝曰今  
誰不能詩者乃敢以四子鳴因各匿其詩不出久之士

業即世吾數人先後皆散去伯衡又連有骨肉之痛貌瘁神傷他人視其詩不覺也予讀之輒不能堪去二年再至而伯衡仍以事留未歸相見喜且泣吾輩皆將老矣後此聚會不知何時聊記之以見我兩人之相善如此若其詩後必有識之者不待予言也

### 佳山堂詩序

頃年樂不叙名人詩蓋有所為而然一日相國易齋先生佳山堂集成命叙辭至再不可章嘗受知于先生伏

讀永歎者累日夫詩與樂為源流古者詩作而被諸樂  
後世樂亡而散見諸詩大抵憂心感者其聲噍以殺樂  
心感者其聲嗶以緩怒心感者其聲粗以厲敬心感者  
其聲直以庶君子懷易直子諒之心則必多和平嗶緩  
之聲誠積之於中不自知其然也故曰溫柔敦厚詩教  
也先生起北海文敏公之後懷仁輔義冲然如不及未  
嘗揭揭以詩名跡其志行皆溫柔敦厚之意得之詩教  
為多嘗對客微吟泉注雲奔不屑爭字句工拙晚乃益



事追琢出入三唐樂府五言古尤有漢魏遺音其憂時  
愍事不無小雅悽惻之言而讀之蒼然油然義切而辭  
隱無噪噉噉殺之聲所謂洋洋大國風者茲其苗裔邪  
吾聞古君子在野則思廊廟立朝不忘江湖先生處綸  
靡密勿獻替以人事君罔懈夙夜年七十引疾乞免書  
凡三四上溫詔固留而東山別墅之興鬱不可已間休  
沐過萬柳堂與賢士大夫一觴一豆稱文字之游見者  
不知其為相國也且門無私謁索無長物而好獎接嶺

旅憔悴詞賦之客周其困乏或藉以舉火仁民惠物之事未嘗一日忘於心此其詩之溫柔敦厚所由來也今天子湛深古學喜聲詩使先生日進其所撰豈不足以鼓吹正始也哉嘗竊論詩文之道與治亂終始先生則喟歎曰宋詩自有其工采之可以綜正變焉近乃欲祖宋元而祧前古風漸以不競非盛世清明廣大之音也願與子共振之夫孔子刪詩而雅頌得所延陵聽樂而興衰是徵詩也者持也由是言之謂先生以詩持世可

也

莊簡討宛遊草序

歲之初夏晉陵莊澹庵先生來宛陵輒同汎青溪登響  
山舉酒賦詩驪竟日已屬余曰鄉嘗客於斯與邦人士  
相暱遊人系一詩篇什遂多距今未十年而舊游二三  
零謝撫卷增歎又得與諸君子驪也將合刻之以志不  
忘是為宛遊艸惟君序之嗟乎余與澹庵兄弟同舉禮  
闈官京師其兄弟年最少入直史館時稱雙壁人南北

聚散垂二紀動如參商羈過宛不及見又不數會俯  
仰少壯忽忽將老吾郡交游風物又非昔時是可感也  
夫古人邂逅適願歌詩贈答及其離思鬱陶三致懷於  
蒹葭杖杜之間其詩具在世不古處尊酒未散棄之如  
履跡然去而不顧澹庵家世侍從門下士多名人鉅公  
能自傾下所至無問識不識折節論交詩文書畫脫手  
淋漓若忘其為貴人且去而思之纏綿不忘有足多者  
今又自涇川遊水西將登匡廬度嶺而南放乎羅浮其

繼此士大夫之游從贈答累帙不可勝紀也而獨拳拳於吾宛何哉詩有友生伐木之篇騷有美人芳草之贈皆是物也澹庵所著書不一種重今昔游好離合之感故叙

### 遺山堂詩序

高子阮懷工古今文詞尤長於詩力不能板行郡幕張公菊水刻之是為遺山詩集遺山者阮懷所自號也性疏忼自負不肯乞名人為序以予故貧賤相狎游屬曰

序吾詩者宜莫如子余蓋以文辭交阮懷三十年所矣  
古稱人才既難近在比閭尤不易得李杜元白韓孟諸  
人雖同時比肩倡和其生不同邑并聚散之間徃徃悵  
歎未有望衡接宇游處往來歷年數十如余與阮懷者  
也余奔走仕宦善病早衰追尋先人理學之緒嘗家居  
累月不為詩阮懷夙有俊名總角補諸生輒仰餽有司  
試必稱最固宜咄嗟取科第天獨困折之使久不得吐  
氣其大父瀛臺先生刺興國州廉直無長物阮懷賣書

給膏火壯年喪妻積數歲不得娶日夕堅坐手一編苦  
吟至夜半故其詩優入乎古人殆天畀之獨厚也吾邑  
詩人不乏歲時聚朋好文酒談讌人各有篇遇其詩擅  
場嘗令人自廢余近在京師與宋觀察荔裳王農部阮  
亭諸公抵掌時彥每亟稱之今其入對策大廷也橐其  
書游名公卿間必有折輩行與定交者其立名都下無  
疑也出其所餘當不難取高第為顯官余獨難其才耳  
子昂碎琴於都市馬周濯足於酒家皆以才士窮愁不

得志立名然則阮懷之不早遇乃其所為遇也

金長真詩序

昔之士大夫患少文今之士大夫患少實其於詩亦然  
前輩服官尚治行不殫力詞翰於時天下能詩二三巨  
公可指數近之好事者或喜詞翰簿簿書人各有集韓  
子言為大吏者意得志滿常不暇以為而今求勝於閭  
巷篤吟之士於是窮鬼極羅摹古籠今連為大冊汎覽  
其言若天下之大事物之繁畢萃其胸中而抽繹其心



之所誠然則若多可已者故曰少實也夫文盛而大道  
隱詩盛而實學衰余蓋心悲之詩本以存王迹而其流  
至是曩者壯盛與金公長真京邸論詩爾時繭雪錦帆  
飛濤邵村諸同舍環坐虎視氣勃勃不自禁蓋至于今  
別三十年而始相見自傷聞道遲暮未免以詩文相徵  
逐而猶幸與故人勞苦無恙輒握手曰良更故難為君  
所至不赫赫而見思於人有令名是臻何德而然邪公  
笑謝不言而數召客飲嗟乎耆舊彫喪士茅靡日甚中

不乏賢者蘭艾齊觀於是大吏之庭無文士跡公秉節  
金陵於官無壅滯乃從羽檄驛騷之餘噓枯拾燼間集  
賢士名人文酒談讌且側身與布衣遊酒酣月出清風  
灑然覺王謝聲華未歇亦一盛也客請出其集則謝不  
敏豈懲近人之多而不肯出邪君子之立言求近于道  
也單詞不為少若其非也連軸不為多今觀其去官汝  
寧有傷離父老之感返駕京國有流連桑梓之懷而其  
樂易近人好古喜賓客則出處一也其人其詩具見矣

長真嘗極論何大復集手訂以行又出入與詞人俱其  
前後撰著度必盈篋好余詩而不盡以示我當與客大  
索其篋以發其藏

王丹麓松溪詩集序

地有為詩助者宜莫若杭之西湖西湖當吳越之交山  
水清妙比戶詩書天下賢雋所畢集士得相唱詠為工  
然非積學多沈思則終不能以有立王子丹麓家湖墅  
為西湖道所必出同好者又有張祖望徐堃君陸蓋思

王仲昭為晨夕鄰曲之友故其詩尤多余嘗與同年林鐵崖叙論詩人以為詩固難言詩人尤不易今之工者多飾邪郭挈菁華其有出於時或矜已忤物誕蕩不可近於是號稱詩人者寔為有道所不錄鐵崖蓋深歎之丹麓世家子為名諸生家多藏書束身善下悃悞如山中人既厭舉子業網羅述作自放其窮愁嘗悲王元美文章九命之說足使文人失志悉反其說取古文人之通顯壽考聲實榮暢者輯為更定文章九命一編讀之

陽氣且滿大宅若春日之煖寒谷也其它旁引雜輯多  
所裨利於人松溪詩若干卷近體清和遙雋出入唐音  
樂府五言古如詠懷覽古尤多杰然可傳者文章之道  
與世會遷易于鱗唐無五言古誠為刻論史稱陳拾遺  
始變雅正作感遇詩三十八章為海內文宗今其詩具  
存雖一變徐庾視漢魏奚若充丹麓之力其去古人不  
讓矣初居尊甫瑞虹先生憂葬喪盡禮銜恤實涕徧告  
當世鉅公乞為志傳成帙曰幽光錄士大夫讀而悲之

家既稍落又時時刻書質衣命酒其詩曰平生好賓客  
資用苦不周有懷莫可告室人且見尤余誦之輒失笑  
蓋有類予者頃過北關亟歸丹麓走要予舟中彊定其  
詩比昏黑始別去嗟乎丹麓於余奚取哉往歲辛丑客  
西湖丹麓觴予霞舉堂是時新建王于一山陰徐伯調  
武進鄒訐士會稽羅弘載與比鄰陸蓋思高仲兄弟皆  
在窮日夜詠言醉則就榻今十許年耳曩者之客惟余  
及蓋思弘載三人無恙餘皆地下游矣良會為難詩文

益可愛惜予與丹麓相視憮然未可以一二言盡也

### 梅定九詩序

吾宛陵梅氏自聖俞先生以來世以詩名往敘述之衆矣最後得梅子定九詩定九有志於君子之道目之為詩人則瞿然謝不敏余益心異之夫日月星辰天之文也山川草木地之文也天官五行厯律度數則所以經緯天地而妙其推測者也吾處天地之間俯仰上下心迷目眩漫無闕度比於蟄蟲寒鳥徒自號曰文人詩人

也亦奚益哉定九砥礪學行探本知類於象緯厯算之學殆由性成數計心通能自制器以準象間取西洋之學發揮討論南中言厯學者數家質疑送難皆歎遜以為莫及嘗手列其所見厯學諸書凡數十種多人所未見猶欲廣搜秘本以資叅互屬余網羅可謂好學深思者也昔房玄齡等重撰晉書天文厯律五行三志專屬李淳風為能深明星厯故可觀采當今國家方纂修明史使得定九叅與其中修天文厯律諸志即未知視淳



風何若當有可觀惜乎其不獲與也平生既罕徵遂中年早鰥遂不復娶日夜枕籍詩書以自娛暢其溢而為文振筆風發技藝則冠其曹又溢而為詩清真靜遠稱心為言無時人餽飮裘馬之習易傳有之君子以言有物而行有恒夫詩不足以盡定九而其詩已卓犖有出於人是可以知定九矣

瑟齋詩序

吾寧在漢為丹陽郡而春穀縣見於當時即今南陵也

縣之來最古未聞有文學之士卓然特著於冊者往官京師何子生伯以明經高第入對策相見論詩今二十餘年而其詩所謂瑟齋集者始出余謂生伯真詩人不俟其詩見也何以言之阮嗣宗陶元亮李太白諸人皆有邁世遺物泰然自得之意故其詩不字彫句琢而讀之超舉益非徒事詩也生伯廷對淹久不得仕帶索躡屨門庭蕭遠客到則一豆一壺野飲高歌樂將終焉嘒嘒然無遲暮憔悴之色吾是以知其詩人也詩也者持

也謂其能持人志也故不充詘於富貴不隕獲於貧賤  
風人之槩也生伯同里先達秦豈人觀察王千峰太守  
皆最舊不肯往游邑大夫屈侯常加禮焉邑東郭龍會  
橋地近安賢寺杜牧之所謂謝家池上安賢寺也橋有  
亭久廢生伯請屈大夫新之其高數丈西望都盡生伯  
為之賦累數千言觴予其上騁竟日憑檻呼小杜恨不  
見我觀其詩清真閒遠多抒寫素臆與古作者不膚附  
至其雄警挺拔類有李杜之遺焉先是邑諸生咸此公

名於斯櫟下周司農序刻其詩余詢之邑人罕知者而  
籍司農以顯生伯之詩遠加於盛氏其不泯於後當不  
待余言也客徵瑟齋之義生伯曰瑟之為言續密也又  
蕭瑟也他日別築一畝之宮當曰瑟園余笑曰君既  
雅飲又洋洋能詩歌於蕭瑟何有于是大笑并次其語  
識之

天延閣詩序

才之相去古今人不甚遠也古人之取之也博用之也

約其學不惟詩歌文詞也而所為乃絕工商周以下洎  
乎魏晉之作者可攷而知也唐以詩為業矣李杜數家  
而外以集名者卷帙不多以彼一代之制竭其平生之  
勤存者不逮什一又不敢備體其矜慎如此今人束髮  
受舉子業父師之所督儕友之所切劘胥是焉在猶患  
不工及壯長通籍或中年放廢始涉筆於詩稍順聲律  
便登簡帙以不專之業兼欲速之心弋無涯之名懷難  
割之愛固宜出古人下也吾觀前輩刻意矜慎者或不

幸而無傳以其磨耗精力劇腎抽肝冀萬一不朽於來  
世藏之篋笥不肯輕出年既遲暮中更世故十九散逸  
蓋又有足悲者白香山編長慶集成作詩自快有以也  
吾友梅淵公有事于詩久矣今刪擇諸編合為天延閣  
集其肆力以博而守之以約者邪淵公名家子生長閭  
閻姿儀朗秀有叔寶當年之目其時插架萬卷歌呼自  
適酒徒詞客常滿坐已而遭亂家落棄舉子業屏跡稼  
園竄身巖谷鬱鬱無所處始出應鄉舉用是知名驅車

而北再上春官不得志往還周覽燕齊梁宋之間遊接  
日繁而其詩凡數變其始年壯氣盛叱咤成篇久之日  
見不足杯罷夜開輒取舊所為讐校刪過半其沉至纏  
綿之意則見之崎嶇喪亂巖棲旅食者為多讀其詩可  
以攷其時徵其地焉詠歌之餘間作墨畫下筆礮礪多  
奇氣予自少交淵公溪園接近數相就視當時淵公從  
子杓司詩辭通雋獨喜自負淵公奮全力相馳驟已而  
杓司跼弛病廢倦於詩又佯狂喜觸忌諱嘗刻其響山

集屬叙余謝不敏今覽其遺詩翩翩可誦而其墓木拱  
矣吾與淵公俯仰上下慨盛名之難立怵日月之易流  
未嘗不相顧三歎而淵公顧益淳演積累風發泉涌睥  
睨前人梅氏詩盛自都官淵公之所為若此固宜克稱  
其家也感杓司平生之言故因叙而及之

程山尊詩序

遊於歆得一士焉程子山尊其人也程子不善治家人  
產席其先之舊業讀書喜客家稍落客或有急不能脫



手贈若負重創必曲折營赴得當然後快其間中豪有  
負程子累千金索之不應程子恥速之訟也恣置不問  
有園一區藏書萬餘卷暇則為詩歌自娛所與交者黃  
岡杜于皇南城徐仲光寧都魏凝叔京口蔣前民皆一  
時文字之游魏蔣余未見心知其人杜徐則吾友也以  
是益歎息知其賢壬子秋余在歙程子適歸自廣陵與  
之游月餘入則共園林琴酒之歡出則同山水詠觀之  
樂抗懷古昔浩然若有得也間問詩於余余曰去浮艷

與清態去浮艷近古去清態近厚夫裘馬紈絢之習既  
不足尚就使楮冠芒屨敝敝焉憔悴其形容淒寒其音  
節以號為詩人豈所為清明廣大之道哉本乎道德之  
源發為書卷之氣油油然漉漉然鏘金石而感鬼神可  
也程子大稱善曰吾知所進於是矣舊所刻春帆集皆  
五言律之工者頃送余別復為七言古歌夫趙瑟秦箏  
不入黔婁之室高文奇冊不出猗頓之門程氏自侍御  
公以下世貴顯程子獨屈首文學以詩鳴一時富貴擁

賢自雄者率迂程子相睥睨程子亦輒睥睨掉臂去嗟  
乎士不遇故窮其樂故在彼富貴浮雲移瞬磨滅亦復  
何與人事吾願程子之更有進也程子世為簞墩人二  
程夫子之裔也獨寐寤歌永矢弗諼古之人蓋有道以  
處此矣

梅耦長詩序

天之於人常輕予以富貴而重新以文辭故其影纓組  
擁車騎乘時得志者代不勝數求之以文辭百無二三

而閭巷窶賤之士挾其藝以鳴王公貴人或推遜為不敢望何其重也然古立名之士積其精華需以年歲大抵書成以暮齒雖以子雲之才尚悔其少作況下馬者乎而英絕領袖之士負才特出不為飢寒所亂家酷貧而學富年方少而名成以褻然見穎於當世蓋又有難能者焉吾邑梅氏世以詩名予嘗序亡友梅君朗三之詩自聖俞以下數人皆工文辭卒未通顯為之歎息今朗三之子耦長又以詩名於時夫朗三以諸生席其大

父禹金先生家學文詞書畫風流藉甚陳卧子嘗手錄其詩而中年即世是時其孤耦長甫數歲惇惇依母劉太君家無甌石卒能抗奮力學發讀其先世藏書自拔於儕俗為詩披華振秀清警獨勝謂非士之英絕者與一時四方之客至吾宣者無不願見與之游郡佐營山張公又刻其詩以張之不可謂無知己而年垂三十尚困於布衣詩之能窮人至此哉前歲載書挾冊將遊京師以母太君老臨發而止今所與朝夕惟余與阮懷淵

公方鄙諸窮人耳夫顧況之於白居易韓愈之於李賀類有所引重以成聲往隆萬間梅氏諸賢如禹金季豹泰符子馬勉叔人各名家率為當世巨公所器許王元美所謂梅家樹樹花也就中子馬勉叔年最少其詩具在以耦長視之尤為秀出使復有偉人負天下文章之望者一定其品目其聲施四遠必矣奈何局守閭巷甘與一二窮愁野老相游處哉或曰士患無實不患不彰子姑蓄所學以俟時客皆以為然遂書之以張耦長之

窮其平生詩甚多將有所待以成集今所刻三卷謂之  
山栖詩略

白下近詩小序

觀察金公長真綜治驛鹽吏事繁促而其詩日益有聞  
徃余叙其天中艸鄧子孝威刻而傳之矣頃又集所為  
白下詩得若干首使來告曰吾勞於官而稍逸於是也  
盍再序我白下自六季為名都散藻蜚英連王屬謝闌  
闌詩書士女彬彬比游經戎馬文獻摧落桃葉停歌鳳

臺傳燧羽檄之使夜呼鐵騎之師雨集明遠睥燕城而  
感賦子山顧江左以興哀公於此時左右舟車咄嗟供  
億猶復時時詠歌不絕二水三山既已流聲漸被矣又  
歲時沂淮沿吳留連花洲虎阜間當其風和景妍倡和  
文酒陶然樂也然而徵兵轉餉乘傳驛騷宵旦拮据不  
遑啟處公之為詩豈獨流連景物云爾哉其必有所感  
也夫楊柳雨雪大夫有行役之章芳草美人騷客多瓌  
詭之作先生志潔行芳服官廉好士篤非古風人之流



亞與日月既逝壯盛不來余倦論詩久矣微公其孰起我也

石語軒詩序

溯余雙溪而上五十里曰水東其臨溪而族處者梅氏多隱君子而梅子翔先生築草堂於水東之渚曰石語軒兄弟羣從讀書其中余少時往還最數倡和為詩者四五人既而悔之以為君子之道甚大所樹立於天下者甚多安事此區區為故常以行業相砥礪而視詩為

餘事然叙孤憤道窮愁處崇巖大壑之間寫幽人志士之感非詩不為歡子翔含風咀雅意多蘊藉未肯急出其詩人亦罕見之者及病將衰始取散逸諸稿稍次其可存者屬余序之憶昔弱歲與子翔同學為制科之文見其引繩尺辨毫茫渟涵既深持滿而發無不當意金沙周鹿溪先生嘗會江上下文士數百人日試五篇於江上之士推子翔及余為冠謂坐客曰此雙壁皆國士也吳下人雖強項見其文皆嘆賞奪氣今後起之秀多

獵取科名而子翔獨軾軻不過豈非命哉余視學山左  
意獨念君遣騎要致同詣闕里謁孔林陟泰岱之巔抵  
滄海之涘俯仰顧盼相屬為歌君在客多暇東游之作  
尤富且工山陰徐伯調盛為稱引相與舉酒論文豪氣  
故在今十餘年而壯齒就衰顏然鮮筆墨之懼伯調近  
已下世屈指少時東渚論詩之友罕有存者此余輩之  
所為感愴摧心也子翔敦行誼謹取與晚多憂戚益勇  
於為善為閭里所稱予常序而傳之讀其詩可以畧見

其人焉

陽坡草堂詩序

詩言志視其性情苟非其人雖學弗工也其次則視地  
邱壑之美江山之助古之詠歌見志者徃徃藉是志足  
以宣地足以輔且優游之以歲月愁苦其心思使之徘  
徊蘊結磅礴其所欲言是天之所以啟詩人也吾鄉故  
山城其特出而冠者疊嶂謝公北樓在焉今為官舍不  
可入其在東南高可陟而最勝者為陽坡吾友汪子發

若居之所謂陽坡草堂者也往讀所謂草堂記山川登望之勝歷歷如數其詩披胸寫臆不事勦襲數屬予論叙迫有更事久不報然其篇什積累益富發若嘗從其伯氏顯若問學同舉於鄉人皆謂發若年少玉立必讀中祕書伯氏既成進士為湘鄉發若猶困公車故得豐其暇豫俯仰雲霞搜抉草木以自見於詩是其人與地殆相得而益彰也湘鄉君仕末期月遽厭人間發若益憔悴苦吟不能已夫汪氏伯仲並予同門公車射策無

寢食不共十年以來聚散存亡百端俱集安得數日無事把盞讌遊於陽坡竹木之間乎發若為藏斗酒當與君倚歌而和矣

歲星堂詩序

文辭之卓然表見於世者有二焉其一曰可喜清詞麗句目眩情移者是也其一曰可畏勁氣雄風驚魂動魄不可逼視者是也人情好投以所喜而避其所畏故競為軟美塗飾之辭夸世弋名譬猶燕趙之佳人吳楚之

艷質粉白黛綠爭妍取憐忽有偉人高官佩劍顧盼非常不知所從來袒臂大呼衆皆潰散其氣量之大小強弱蓋若斯殊也杜陵有云或看翡翠蘭若上未掣鯨魚碧海此老跋扈已見乎辭矣伯調與予論詩最久其詩不甚可喜然魁梧自負當其研練匠心則堅金美玉無可瑕疵以予官齊魯褰裳渡江北遊淮泗涉黃河登泰山而望滄海鬱其蒼茫之氣著為詩歌尤洋洋多大風望氣者皆錯愕斂手予嘗畏其難欲抑之使近人伯

調握筆不肯下殆未易與爭雄也客秋捆載其詩訪予宛陵適予留滯邦關不得見今相聚武林而其集已刻成萊陽宋公序之矣聊書其所獨異者以識其端若使詩能窮人如伯調者雖欲不窮不可得已

學餘堂文集卷七



欽定四庫全書

學餘堂文集卷八

翰林院侍讀施閏章撰

贈送序

贈陳方伯序

宮詹學士陳先生出為山東右布政使一年遷陝西左使以行諸大夫皆悵悵施子襄衷執手不能語或曰子何戀之深也施子曰微子之問余固不自解也先生官

宮詹時以文章名後進者願得一言引重余時官比部  
謁以詩善之及先生藩於東送以詩又善之已而余為  
學使者至則先生為賦詩二章且序余詩已見余校士  
書又序之皆纏綿勤懇窮流溯源洋洋數千言余性硜  
鄙疏濶數與世齟齬先生匡之以道掖之以力嘗言有  
詩文若干卷將盡出之屬余論次為簿書所奪不果而  
先生行矣夫以先生之才起家詞臣珥筆禁苑其於錢  
穀簿書固一切置不問而後役焉錢穀簿書是司得微

有未盡乎哉

天子即特試廷臣領藩牧既歷年所其能不思股肱才  
哉秦方用兵羽書旁午其民獷悍不馴婦人女子皆習  
戰好鬪歲又洊饑芻餉無出幅員數千里飛輓不繼非  
得武健嚴酷之人勢不足以集事雖然獨不見先生所  
以治齊者乎齊之民急利好詐走死如鶩至獷悍不馴  
也先生至則錢法行盜鑄息市肆不擾上下以和中丞  
直指之按部者罔不首推轂諸司大夫及搢紳先生皆

相得甚驩雅善書法人爭貯墨汁紈素伺間乞書得則  
以為幸其見慕如此攝左司數月簿書錢穀無愆期御  
事和平而政日以舉行之既效矣移其治齊者治秦何  
難焉且秦苦兵荒久矣以鳩形鵠面之遺黎剝肉醫瘡  
又不善其拊循申其期會而徒操切是務吾不知武健  
嚴酷者之得失何如也夫民肢體也財膏血也瘡痍之  
民黃項槁膚形容憔悴迫而索其膏血立斃耳不若舒  
其手足導其筋力而後膏血可得而貫輸也先生亦移

其治齊者治秦可矣何難焉然而余之私戀於先生蓋終不能已也時陸大夫石齋出餞聞余言而善之曰是可以贈先生先生行矣

送按察朱公之任關中序

余既為文送陝西左布政使陳公閱旬日按察朱公亦報遷去則陝之右布政使也二公同官於齊甚善今適秦復先後與俱喜可知也而閔章待罪於此與按察連署按士之暇無朝夕不見習朱公最蓋按察之難為久

矣於今尤甚臺使者所彈射及郡國小大獄悉仰質成  
旦起受牘吏兩手不能抱事有定限須吏緩則得罪山  
東地方千餘里上下必旬日吏或翫法獄經歲不斷况  
重以逃人之峻法贖鍰之考成即出入戴星始而銳中  
而衰終而怠者比比也公至未期月大獄之奏報者數  
百活吏民論死者百餘人向之數海岱為逋逃者面縛  
以歸贖鍰積數歲者一旦按籍取盈也公何以臻此公  
筮仕深州深故多巨盜衝突為患公募其豪攝以威信

使轉相招捕逾年悉散隣境有掠於途者臺檄強屬公  
公一訊輒得其主名凡三年而論最者九備兵莊浪分  
守河南皆鑿鑿著名實賊逼南陽擐甲胄拒之河蒞東  
泉數月追叙其功加一級說者謂公即不內召例當左  
藩乃竟得右也公慨然語予曰家大人昔藩江南撫登  
萊鄖陽余未嘗不從今大人春秋高無兄弟去此而西  
惟定省濶遠是疚敢區區校量於內外左右遷擢之間  
乎哉閔章既深習公而又重公之言仕不忘親竊有動

於中也書以為贈且以質之陳公

送馮永豐歸山陰序

山陰馮君木伯以進士知吉州之永豐賦平訟簡豐人  
安之逾年坐擅撫山賊奪官以隣縣盜發殺人語連豐  
所撫盜故也豐之父老子弟駢肩連踵匍匐叫呼者千  
百人皆來告曰侯實活我毋奪我侯且盜穴山箐中久  
困兵力勦不如撫便彼既歸命不即納則烏散狼奔耳  
故不如撫便又曰侯所撫盜實不反其掠隣縣者它盜



也它盜惡其異已而受撫故藉口以豐為壑也又曰

天子神武不殺盜據山海者次第納款皆錄用先是邑  
鄧侯且以撫盜紀績矣今獨以是斥命也幸公監茲土  
丐留之勿聽去語畢皆叩頭號哭淚雨下庭土為濕居  
無何有詔捕殺盜馮君為佐方略盡禽之督府補牘以  
聞為文武吏救過而馮君竟坐斥去豐人愁痛哀號不  
自擇相與刻石頌德尸而祝之俎豆於豐水之上徒跣  
泣送者緣江行數十里不絕予聞之歎息隕涕而馮君

告行慨然就道無咨嗟涕泣不平之色君子聞之曰苟有以處則出非其戀也苟有以仕則去非其恥也觀豐人之不忍其去馮君之不怨其行則馮君之為人為政皆可得而知也豐故巖邑號難治而山陰為勝地馮君又能詩歌舍此而歸其亦有灑然取適一時者與盜平之日

天子以災異省躬詔赦天下馮君之斥不患不振予獨惜其去重其人叙以旌之蓋亦豐人之志也

贈無錫施氏五世一堂紀事序

余初抵錫山謁道南祠蓋龜山楊先生講學之所後世  
因而祠之所謂東林書院者也邑先達賢有道者得附  
祀廡下而故憲副施曠如先生與焉余諦審姓氏喜謂  
吾宗有人明日則宗人文學爾麟翁顧我九龍山下其  
子孝廉熙諸生點燾及孫廷琤等翩翩咸集講家人之  
好余因問曠如先生則曰此先大夫也嘗從高忠憲公  
游天啟己未登進士當啓禎之際擊璫靖寇並顯聲績

既歸里以其學授子孫為德於鄉數舉講會春秋七十  
八是年曾孫琤舉一子公猶及見之親命名鉉高一門  
五世邑中藉藉稱盛事間過其家則所謂鉉高者姿骨  
岐嶷甫四歲作禮如成人余因歎近世多故名族替零  
祖不見其孫而子不識其父者衆矣強宗巨室子弟又  
多紈袴用狗馬聲利相馳騁名盛而實衰今自憲副以  
下世有行業爾麟遭亂不試而其子孫數輩或舉於鄉  
或名於庠序羣從兄弟繩繩振振至聚本支五世於一

時寧惟爾麟稱象賢且以追憲副之澤遠也夫松栢不  
產於培塿蛟龍不潛於涔蹄言有所藉而生也余聞諸  
邑父老曰憲副之大父勵庵公策官大僕卿有清德太  
僕之父教尤陰行善蓋國醫云昔何澄以醫活人不亂  
人妻於危難後卒為顯官況其隱德有不可數舉者乎  
賈生有言古之聖人不居朝廷則在醫卜之中茲豈有  
道而游於醫者邪吾又以知施氏之流未艾也會爾麟  
將舉六十之觴諸子弟來徵言遂略次其世行使附之

家乘夫末族世貴上族世德吾宗人其毋忘道南之祀  
用克世其學焉可矣

送汪舟次遊廬山序

施子之去官臨江也汪子舟次至相見喜甚曰楫溯江  
而西一願遊匡廬一願見施使君竊聞使君客日進容  
接苦不給將俟於青原白鷺之間今使君行始敢請一  
見從此入匡廬矣嗟乎汪子是豈今之好遊者哉汪子  
家白嶽并力讀書性故少可以其不得志者發憤為詩

有合於古人之道櫟園先生及吾友荔棠樓岡西樵茗  
文豹人伯籲築夫諸子皆亟推引之見於文詞所謂不  
即人而人即之者也顧恥以客自處喜放浪於名山邃  
谷之遊又以余之去官也不先匡嶽而先僕汲汲然求  
人之所不求者何哉君子不患名之不立也患志之不  
厲氣之日盈以汪子之才譽若此探幽嗜古開一巖壑  
之勝友朋之善不遠數千里褰裳鼓棹以索之若恐後  
宜其所挾之日有出於人也匡廬之秀實甲東南予往

以候風星渚嘗自開先寺攀廬峰俯觀瀑布放乎金輪  
玉簾及三疊泉九雲屏以還所未至者惟東西二林遊  
將有待今汪子年尚少力足以濟勝其所得視僕當倍  
蓰也然吾觀近代廬山記載諸書篇什至不可勝數蘇  
子瞻詩獨少其言曰不識廬山真面目止因身在此山  
中今不知廬山面目何似汪子其深入山中而懷域外  
之觀乎是可以遊矣

贈楊生序



古之君子其立身也粥粥然其若墜於淵其發言也惴惴焉若不出於口若是者何也度其言若行有出於人矣必退而思曰得毋有倍蓰於我者乎得無有十百千萬於我者乎操過人之業者懷不及人之憂積光輝之盛者屢鄙僂之慮是以飭躬足式吐詞為經發迺見遠傳之後世為不可及也孔子見老聃聃告之曰去子之驕氣與多欲態色與淫志夫孔子盛德動容中禮豈實有可去如老子云爾哉而老子告之若此夫子有猶龍

之歎况後世之以言語文辭表見者乎古之君子先河後海言有源也先行後言云有序也今之君子則不然目未周六經而馳騁於裨官之冊口未諧四始而涉獵於詩賦之文或屈首八股終歲呶唔一編則羣目為讀書其視古小成大成之學居何等也浮文盛而實學衰皮之不存毛將安附宜乎天下之大四海之廣求一文人馬未易得也即墨楊生還古志潔而行芳才茂而年盛其鄉皆稱之不肯就有司試縣令張君琛折柬招之

強而後出余為補諸生冠軍錨其文生以其詩文為贅  
逾年萊州憲使張君又合校萊士而冠之遇以國士張  
君號知人生用是名益著念余始遇之殷而度余之將  
行也徒步來歷下又質其詩文各一卷其義高其請益  
之心勤且至矣夫名之將成敗者斯至名之既成忌者  
斯至楊生行業日進而予懼無以益之乃告以古君子  
之道知楊生之必有成也生歸過掖水有羅生鴻圖者  
亦良士且又爾友也其亦以是告之

龍道顯字序

士將為卓然表見於天下後世乎抑取榮旦暮間也賢者其必早辨矣近代取士法既罷徵辟用科目其得第於禮部稱進士者率三歲而致三百人而所謂舉於鄉者數倍於是焉以天下九州髦士之衆與選者僅三百人誠難且貴重積數歲計之則衆矣積二百年不啻萬餘人其可齒數者有幾且不及再世而鄉里之人不能舉其名氏矣以其所挾在貴不在道也孔氏四科不

稱閭閻然由賜諸賢猶嘗服官顏子以陋巷老耳自當  
時七十子迄今王公貴人卒莫敢與顏子比子貢結駟  
連騎雍容過原憲乃為肘見踵決者所詬病是操何尚  
哉君子懷仁履義辭貴不辭賤富不祈土地勇不假干  
櫓庸之車服不為寵棄之蓬蓽不加困處則閭黨尊之  
出則黎庶附之賢士大夫歌咏之史氏書之足乎我者  
既修而爵祿從焉是所謂民之望也道德之表見於時  
者也然而君子固忘其為己有也昔羅文恭公對策推

進士第一人外舅曾君拊背驚喜過望文恭內媿面赤  
徐對曰儒有許大事在是何足云於乎是其志可觀也  
吉水龍君名榜字臚先文恭之鄉人也既成進士不自  
足來從余游又勗其同志者相切劘其事親也謹而與  
人也篤蓋有志於古之道者予知其所貴有在也請更  
字曰道顯而叙其說以進之雖然予亦好言而德不逮  
者能不以是媿於心歟

送孫無言歸黃山序

黃山距予家不數驛予往遊而不果者三馬少時見前輩黃山遊記心異之有自黃山來者輒具問其巖壑木石狀以為樂往歲癸未戒期往以兵亂罷癸巳有事於歙聞人言黃山益奇又戒期往會暑雨晝晦不可遊僉曰秋為善於是又罷秋冬之際遂留金陵閱七年庚子秋策杖裹糧載酒脯將行又恨為事所奪予之不果遊黃山也蓋若鬼神所靳者歙人孫子無言客廣陵十餘年未嘗一日忘黃山所與游者皆為文辭送其歸予謂

廣陵地殯而鰲魚鹽估客之所輻輳也介在江海之間  
烽火無寧歲而黃山為天帝之都仙人之窟宅其去此  
而歸也蓋宜夕脂車朝命駕使人追之不及安俟送為  
予之不果往孫子之未遄歸其母乃皆有所不得已與  
嗟乎天下名山川亦有幸不幸焉黃山蜿蜒數百里連  
宣歙二州其高遠險邃靈異不可殫究宜在五岳之列  
而禹跡不至秦漢祭告不及太史遷謝靈運謝朓杜甫  
之徒皆未聞其往故其名不大著於古而其上有軒轅



煉丹臺事尤荒忽不足信孫子歸矣將灌園種樹其麓  
邪抑攀幽梯險結廬無人之境邪其自放於神仙佛老  
之說迷而不出邪逃空虛者聞人足音而喜孫子好交  
遊重文辭其能入寂寞之鄉離羣而索處乎吾聞黃山  
諸峰天都最高多珍木怪石有異獸守之而不為人害  
僧普門嘗開一徑如鳥道今無塞數十年君果歸其開  
故道先往所過題名俾來者不失路庶幾登絕頂縱遊  
以快予平生未果之願殆將從子而老焉

送杜蕃舒歸里序

杜生蕃舒自齊歸施子贖焉司索者以匱告杜生謝且  
感額曰先生念我則至矣然竊疑其厚人而忘己也意  
者太左計施子曰若以我為過廉乎予蓋天下之貪夫  
也子何敝敝然為我謀杜生口呿色變久之曰從先生  
官三年矣事小大罔弗知也所與交游虛往實歸者衆  
矣而先生橐中無長物以幣進則拒之惟恐不速焦形  
槁顏手校讐而口伊吾夫子病矣如是以為貪將陽拒

而陰納與敢問其說施子曰噫何子之泥於言貪也夫  
取而不能有者非貪也不取而有之人不能奪焉者貪  
之至也莊子曰君子內無飢寒之患外無劫奪之憂子  
不見夫今之鼎食而覆餗者乎戕其軀籍其家以沈其  
宗者比比矣其始不過競筐篚之私卒以捐其所甚愛  
而不遑恤夫人捐其所甚愛至於弃身家舍妻子謂之  
能貪則不可予鄙人也未受事而先飲冰其行若躡其  
居若墜其獨處若羣闖先人後已亦夷亦惠憂讒畏譏

補缺修弊羸有一金而不知所置予蓋患得患失見鄙  
於尼父者也然而疾風震雷守之晏如飽食高坐進退  
生徒陟泰岱觀滄海謁闕里陳詩書搜討舊籍累櫝連  
車寸縑尺楮並蓄無儲盜不睥睨民不咒詛人見不足  
我見有餘此亦貪之至也且夫名浮其實者德之欺也  
勉乎其職而不能盡其道事之末也吾目迷五色而不  
蒙失人之誚行忝顏閔而竊附有道之林吾循孔氏之  
門牆而惴惴然懼其不能入也奉命而出終事而歸所

得後矣況敢自以為廉乎子貌朴而志端歸而修業亦  
務守其不可奪者已矣何敝敝然為我謀杜生聞之喜  
曰吾乃今知先生之所以為貪於是酌酒別去明日次  
其語追而送之濟水之上

送魏惟度歸武夷序

魏子惟度閩人也來大江以南肆其游覽又日索士大  
夫能詩古文者錄而刻之見予武夷記歎曰奈何奪我  
離落間物吾其歸矣願以言餽我嗟夫今之遊士吾蓋

知之矣古之學者息有所遊有方不得已而出或遇方  
僻郡來學於中國遊於京師大者以成其學小以策其  
名今之士多好遊得則忻失則戚甚且老困無所歸以  
是為遊病然士窮失職於今殆甚伏處閭巷無所語不  
得不走四方及倦而歸又率無半畝一丘之地可營草  
堂置書籍以徜徉而忘老吾又知士之難為歸也今魏  
子遊歲餘矣所至惟山水文辭是急有餘力悉資其刻  
詩而其家有枕江堂可高卧而遊也蓋其異於世之遊

者二馬吾不知枕江堂去武夷幾許而武夷之美皆君所知不復道嗟乎自南宋以來道學莫盛於閩而閩莫盛於紫陽吾嘗入閩過建延諸郡求先賢講學處其遺蹟間有存者而武夷之三曲故紫陽書院也溪山回互忽得平壤可置書屋百十間前後諸峰巉秀而遠峙者皆遞進於左右蓋造物所以待有道者而俎豆之廢久矣嘗以告海鹽道程公鳳翥公慨然任其事未幾而程公卒官今子之歸其必有樂乎此也當事有可告則告

之否則聚士之賢者小復其祠而旁構數椽為書屋以歌咏聖賢之道浮屠道士其不得與吾曹爭此尺寸土也吾聞朱子編註諸書蓋多成於武夷子固好文辭歸而求之其必有進於是者請以為贈

送孫豹人歸揚州序

關中孫豹人先生 召試博學宏詞被放將歸復有內閣中書舍人之命同薦諸人奇其遇高其志行屬施子為贈序施子曰士不充拙於富貴不隕穫於貧賤雖有



蒲輪之徵不改懸車之素可謂皜然無忝處士者也豹人北首入都初迫於有司居既久諸待試闕下者多務研練為詞賦豹人獨汎覽他書間語客曰吾僑居廣陵數十口饔飧待我使我官京師不令舉家餓死乎已入試不中良喜遂東書南歸

聖天子詔視諸布衣處士有文學素著老不任職事者其授京銜以寵其行於是及格者七人豹人與焉初擬司經局正字

天子薄其官遂與杜君越傳君山等同授內閣中書舍人是時杜年八十四傳七十三皆未與試先歸矣部議官不及而中旨特授蓋誠異數也時論以放還處士膺舍人清秩恩禮甚厚而豹人芒屨踽踽自若其將以年授官也吏部集驗於庭獨卧不往旋被敦促乃徐入逡巡主爵者望見其鬚眉皆白引之使前曰若老矣豹人直對曰未也我年四十時即若此且我前以老求免試公必以為壯今我不欲以老得官公又以為老何也衆

皆目笑其愚然卒以老官之益非崇儒敬齒無以昭示  
朝廷之恩非引分守窮無以見巖穴之志今處不隱不  
仕之間身貧賤而拜官於朝名富貴而遯跡於野豈不  
稱稽古有餘榮哉豹人今年亦已六十矣而掉頭抗辭  
視今人又何如也其詩操秦聲出入杜韓蘇陸諸家不  
務雕飾吏部趙公玉峰既為刻其書余獨叙其語以送  
之後之稱是官者其知所由重矣

送郡丞唐公遷守大同序

會稽唐公寓庵先生自工部尚書郎出丞吾郡垂十年始擢守大同或謂公起家上第號廉能晉秩何晚吾郡人皆咄惜曰奈何奪我公速是何遲速交憾與君子聞而解之曰憾晚者為公謀也憾速者郡人自為謀也古有攀轅卧轍至聚薪塞路使不得行者豈不欲其游膺崇秩哉誠利其牧我而惜其去我也故其愛而祝之一歲九遷不為勤其戀而留之也十年一調猶恨速由是觀之其所以為政者可知矣郡之有丞所以左右太

守出政令者也近例太守獨貴重丞不專訟牘惟詰戎  
捕盜是職先是治盜者數為民病喋莫敢言公至則蠲  
煩苛省勾攝向之赭衣駢跡者今且訟庭間若也余間  
相接侍則坐語移日公為人常集枯辭苑劇郡巖邑缺  
官亟推公攝事多方辭免及督運轉餉造戰艦驅馳王  
路人所望而趙趙者未嘗以勞為解又問民疾苦議減  
質庫子錢三之一禁民俗溺女捐索隄琴溪以障支流  
民稱便君子處不得為之地患不得盡其才處得為之

地患不能盡其心公為丞弼粥不盡展尺寸其治效若  
此況其得專制於一郡也哉大同古雲中地三面阻邊  
扼雁門狐塞之險李廣魏尚並以名將為守臣漢以來  
用兵處也今天下中外一家邊烽寢息坐鎮以總戎而  
守臣不握兵柄昔之守在勇以捍敵今之守在靜以安  
民公數言太夫人春秋高不樂遠官然太夫人強飯無  
恙且公嘗典試三晉習知其道里山川公行矣詩有之  
曰王事靡盬不遑將母其鎮撫百姓和輯將吏以紓

天子西顧則雖守雲中亦如渤海潁川可卧治之耳吾  
聞邊地早寒黃沙白艸即盛夏不葛而裘試褰帷按部  
觀蘇武城及李魏守邊故蹟時取白墮春醪與賓客滿  
引劍舞鏡歌為娛樂回憶江南風土敬亭雲月其遂忘  
我陵陽一片土也余愧不能攀卧留公請酌酒撰辭以  
為公贈

學餘堂文集卷八